

# Dionima: titina: tapaeyeke wapee

---

## Panake Pi

**1** <sup>1</sup>Nikana:ma:ta: mo hande amba: kini pitolo hata: pa hao hao hala: da:ta:la: pina: pi kone iki pa:ta: laasoma:me. Nikana:ma: opoloma: make ota: nika: lekema: handoloma:me. Ota:e. Nika: lekema: handoloma: make nika: kikima: ota: wataaloma:me. <sup>2</sup>Hande Da:ta:la: ekita: do kenkema: handolo poloma: tupa: peneme yamo epeeke handa nikana:ma: handoma:me. Kutupa koto mo Ateke yaapo hao hayeke niki pa:ta: peneme yaeya: Deto hala: ekina: pi iki pa:ta: la kitolome. <sup>3</sup>Nikana:ma: handaa opoloma: ekita: iki paeyao pa:ta: make opuaasoma:me. Pa ekipeke nikana:ma: mo Ateke make ipika: Eiyeke Yesu Ketiso ameḷe hone homeke uluma: ekita: iki ameḷe mandakena: apa:tamena:yeke loma:me. <sup>4</sup>Nikana:ma: doeki laasoma: ekita: mo nika: ta:na: pa:la:eki ota: anekema: tumbulu baena:yeke pitoloma:me.

## Koda:ta: paḷe

<sup>5</sup>Ameta: nikana:ma: mo Koda:na: Eiyeke pa:ta: yama: opoloma: ekimanu iki paeyao pa:ta: opuaaseme ekita: doe. Koda:ta: paḷe kone yaalo hata: ipiki pa:ta:ta: timba: la:la:eki ota: ma:nda: dia:me. <sup>6</sup>Kota: koto ya:ka:na:ta: nikana:ma: alota: Ipiki ameḷe homeke hone uluma:me la alo hata: pa homeke dina: kone timba: ala:eki pa:ta: haoma:ka:na:ta: nikana:ma:ta: mo nika: pi aloma: ekita: makeaasa: hau pitoloma: make yayapikieki pitoloma:me. <sup>7</sup>Pate mo ipikita: paḷe pa:la:eki pa:ta: hala: tupa: niki make mo paḷe pa:la:eki pa:ta: hao poluma:ka:na:ta: kota: nikita: mandakena: hone homeke u alualu poloma:me. Kutupa ipika: Eiyeke Yesuna: wema:ta: nika: hokeeki paeyao wamo peaasa:me.

<sup>8</sup>Nikana:ma: alo hata: Nikita: hokeeki na ula:me loma:ka:na:ta: kota: nikana:ma:ta: nika: kone makeaasoma:me. Kutupa niki pa:ta:ta: ota:eki na ula:me. <sup>9</sup>Pate nikana:ma: nika: hoke haumanu Koda: pa:ta: kelepomaka:na:ta: kota: ipikana:ma: ipika: pulueke laa la: ula:eki

pilieke. Kutupa ota: tikitiki pita:la: hau pitolo hata: nika: hoke haumanu paeyao paeyaasota: nika: hokeeki poloma:eki paeyao wamo pealieke. <sup>10</sup>Kota: a:nda: nikana:ma: alo hata: Nikita: hoke hau na poloma:me la loma:ka:na:ta: nikana:ma: Koda:ta: yayapiki pi lo hala: hali au laasoma:me. Kutupa ipika: pita: niki pa:ta: na ula:me.

### Ketisota: nika: tamba: mina:la: hali

**2** <sup>1</sup>Yaka wekiwandiki ikana:ma: hokeeki na pulu peleme tupa: Ima: doeki iki pa:ta: laasome. Pate ma:nda: epima: hokeeki pia:ka:na:ta: kota: nika: hau peaaso hata: Apa: pa:ta: honke lawaasa: some ma:nda: hala:me. Ipikita: tikitiki piki some Yesu Ketiso hala:me. <sup>2</sup>Kutupa Ketisota: nika: hoke hau paeyawala: ekina: tekee. Nika: hoke hau homeke dia:ya:la:pate pa paeyao sikina: hoke hau make loa:me.

<sup>3</sup>Kutupa nikana:ma: Koda:na: pi ula: ekimanu opua puma:ka:na:ta: kota: ipiki handoloma:me laa nika: hone uluma:me. <sup>4</sup>Pate ma:nda:ma: alo hata: alota: Ima:ta: ipiki handolota alo kone ipika: pi ula: ekimanu na opua pia:ka:na:ta: kota: kutu pita:la: someta: yayapiki pi ala: some make mo ota: pi ala: ekita: ipiki pa:ta: na ula:me. <sup>5</sup>Pate ma:nda: epima: Koda:na: pi opua pua:tiki pita:la: someta: kota: ipiki Koda: pa:ta: puki hala:la: ekita: ota: anekema: handaa ula:me. Nikita: Koda: ame<sup>le</sup> ta:ma:ni poloma:me laa hone uluekema: pea:pekeeki dupa. <sup>6</sup>Ma:nda: epima: Koda: yaapo ta:ma:ni pea halome lea:ka:na:ta: kota: ipikita: mo Yesu Ketisoma: pieke tupa: kone hao pelia:peke ya:la:me.

### Panake pi ula:eki

<sup>7</sup>Yaka pukipiki yankeke tonuo. Iki pa:ta: Ima: do laaso pi ula: ekita: panakeeki dia:me. Mo kini pitolo hata: hande amba: wia haeme pi ula:eki konee. Koto amba: pi ula: ekita: ika: amba: hande opeleme ekimanue. <sup>8</sup>Koto pa:la:pate Ima: ame do laaso pi ula: ekita: panakeekie. Pa ekipeke ipika: ota: ekita: Ketiso pa:ta: make iki pa:ta: make handoloma:me. Kota: mo timba: ala: ekita: amba: lombei pita:la:me. Kutupa mo ota: paa pa:la: ekita: amba: paa pita:la:me.

<sup>9</sup>Ma:nda: epima: ipikita: mo paa pa:la:eki pa:ta: halome alo kone ipika: kame honditi pia:ka:na:ta: kota: ipikita: ame do make timba: leke pa:ta: ha pelia hala:me. <sup>10</sup>Pate manda: epima: ipika: kame pa:ta: pukima: homea:ka:na:ta: kota: ipikita: mo paa pa:la:eki pa:ta: hala:me. Koto ekina: ipiki pa:ta:ta: hoke hau pu tialo pa:la: ekita: ota: ma:nda: na ula:me. <sup>11</sup>Pate ma:nda: epima: ipika: yankeke honditi pia:ka:na:ta: ipikita: timba: leke pa:ta: hala:me. Ipikita: koto pa:ta: pominolo hata: timba: la:la: ekima: leke holu peala: ekiyalo hata:ta: ipika: pula: pota:ta: hone na ula:me.

<sup>12</sup>Yaka wekiwandikio. Mo Ketisona: bikina: ika: hoke hauta: amba: paeyawala: ekina: Ima: iki pa:ta: do pi laasome. <sup>13</sup>Yaka apa:titio. Iki pa:ta:

do pi laaso ekita: pa mo ota: titina: kini pea a:pa pa hao hala: someta: ikana:ma: hone wilimi ekina: loa:me. Panake haliweki iki pa:ta: do pi laasome. Paa ekipeke ikana:ma:ta: mo Hoke Temoko bepolaleme ekina: loa:me.

<sup>14</sup>Yaka wekiwandikio. Iki pa:ta: do pi laaso ekita: ikana:ma: Apa: Koda: handa hone wilimi ekina: loa:me. Yaka apa:titio. Iki pa:ta: do pi laaso ekita: pa mo ota: titina: kini pea a:pa paa hao hala: someta: ikana:ma: hone wilimi ekina: loa:me. Panake haliweki iki pa:ta: do pi laaso ekita: pa mo Koda:na: pi iki pa:ta: e pokolo haena: iki honkopu hasememe. Kutupa ikana:ma:ta: mo Hoke Temoko bepolaleme ekina: loa:me.

<sup>15</sup>Do kenkena: hau o do kenkena: ula: alemanu pa:ta: pukima: na homa:peke. Ikana:ma: do kenkena: ula: alemanu pa:ta: pukima: homemeka:na:ta: kota: Koda: pa:ta: pukima: na homelememe. <sup>16</sup>Do kenkena: ula: ala:ta: ala:ta: paeyaota: pa mo lopa hala: lokena: hone pa:la: ekimanu make wanda:halina: lekema: handolo pukima: homa:la: hau make wanda:halima: ta:na:ma: homaa biki tieke wiaasa: alemanu make koto ale paeyao siki homeke a:nda: Apa: pa:ta: na a:pa:la:me. Koto hau paeyaona: teketa: do kenkena: ekie. <sup>17</sup>Kutupa do kenke make do kenkena: ula: wanda:halina: hone pa:la: alemanu paeyao make koto alemanu paeyao sikita: paeta:la:me. Pate ma:nda: epima: Koda:na: hone pa:la:eki peasa: someta: hoto paeyao da:ta hao halieke.

### **Ketisona: a:nda: tunkiliki hali**

<sup>18</sup>Yaka wekiwandikio. Paetolo nateta: teke pa:ta:e. Mo Ketisona: a:nda: tunkiliki hali ipilieke laata: iki pa:ta: amba: ta opuaeya: handa:e. Koto ekina: ameta: mo Ketisona: a:nda: tunkiliki tapake wopu amba: opolo epelememe. Koto ekina: ameta: paetolo nateta: teke pa:ta: ya:ka:ta:me laa nika: hone uluma:me. <sup>19</sup>Koto wanda:halita: ota: nika: homhomeke hone wia mombololoma:eki tukiki pa:ta: epea:pate pa na apa:taememe. Koto ekina: ikana:ma: niki mina:pa:lalememe. Iki a:nda: nika: mombololoma:eki pa:ta: apa:taemekena: yoluta: kota: niki ameḷe mandakena: halo pimime. Pate ika: pa mina:pa:laemeketa: ota: ma:nda: hondo niki ameḷe na apa:talemeeki peneme yaasememe.

<sup>20</sup>Kutu pimipate pa ya wekiwandikio. Ikita: mo hande Ketisoma: kua:neala: Holi Sipitidi amba: koto miniki halememe. Koto ekina: iki paeyaoma:ta: mo ota: ekita: hone wilimime. <sup>21</sup>Ima: iki pa:ta: tameiya: laaso ekita: pa ikana:ma: mo ota:eki hone na wilimiki yeke dia:ya:la:pate pa mo hone wilimiki handa pueme. Kutupa make mo yayapikieki ma:nda:ta: mo ota:eki pa:ta: na ipula:me laata: hone ika: wilimiki pua:me.

<sup>22</sup>Koto ekina: mo yayapiki pi ala: someta: epi ya:ka:ta:pe. Pa ma:nda: epima: Yesuta: mo Ketiso dia:me ala: some lataa. Dupiki someta: Ketisona: a:nda: tunkiliki somee. Ipikana:ma:ta: Ateke make Eiyeke make hoki

wala:la:me. <sup>23</sup>Ma:nda: epima: a:nda: mo Eiyeye hoki walea:ka:na:ta: kota: Ateke make hoki wala:la:me. Ma:nda: epima: Eiyeye a:nda: pukima: homea:ka:na:ta: kota: Ateke make pukima: homa:la:me.

<sup>24</sup>Koto ekina: hone wopu witolo hata: mo hande titina: kini pitolo hata: opimi pi ika: puki pa:ta: mondu hapa:peke. Ikana:ma: a:nda: koto opimi pi pa u haemeka:na:ta: kota: ikita: mo Eiyeye pita: ipika: Ateke yaapo amele hoto paeyao ta:ma:ni pea halimikie. <sup>25</sup>Kotota: mo hande Ketisoma: niki pa:ta: kulueke laa pi la: wia: ekita: Da:ta:la:eki lataa.

<sup>26</sup>Ima:ta: do laaso ekita: mo iki makealuekema: taapeleme wanda:halina:eki iki pa:ta: do laaso handa:e. <sup>27</sup>Koto pa:la:pate iki pa:ta:ta: Ketisoma: ipika: Sipitidi amba: ka:la:me. Koto ekina: ipika: Sipitidi iki pa:ta: a:nda: pita: pelia haena:ta: iki wala:peke some ma:nda:ta: weiya:peke na ya:la:me. Pa ekipeke mo Sipitidima:ta: iki pa:ta: hau paeyao walieke. Kutupa ipikana:ma: wala:la: ekita: yayapikieki dia:ya:la:pate ota:ekie. Koto ekina: kota: mo Sipitidima: wala:la:eki opua pitolo hata: make Ketiso pa:ta: ta:ma:ni pu pelia hapeke ya:la:me.

<sup>28</sup>Ota:e. Yaka wekiwandikio. Ipiki yaapo ta:ma:ni pea hapee. Pa ekipeke ipiki opolo epea:ka:na:ta: nikita: honkopu haasa: ekima: tumbulu pa:la: tupa: loa:me. Kutupa koto mo ipilia: natena:ta: ipiki handolo hata: yaala:ma: na homolo polome tupa: loa:me. <sup>29</sup>Ketisota: tikitiki pa:la:me laata: ika: hone wilimime. Kota: ma:nda: epi ameda tikitiki piki hau pu haya:ka:na:ta: Koda:na: wekiwandikie laata: ika: hone witolo pelememe.

### Koda:na: wekiwandiki

**3** <sup>1</sup>Mo Apa:ma: niki pa:ta: pukima: homa:la:eki tieke handa:pe. Ipika: pukima: homa:la: ekita: ota: tieke aneke yalo hata:ta: nikita: Koda:na: wekiwandiki lelememe. Kota: koto ekina: nikita: ota: ipika: wekiwandikie. Doeki tekena:ta: do kenke wanda:halima:ta: Koda: na handelemeekei yalo niki make na handelememe. <sup>2</sup>Ota: yaka ta:ma:ni sunuo. Nikita: ameta: Koda:na: wekiwandiki ya:la:pate pa mo wetepena: halo polome ekita: aj na peneme yaala:me. Koto pa:la:pate mo Ketiso opolo ipilia: dina:ta: nikita: ipikima: kone handulumeke. Pa ekipeke ipikita: ota: ipika: hala:eki nika: lekema: handolo polome ekina: loa:me. <sup>3</sup>Pea: epima: Ketiso pa:ta: dupiki hone puao haya:ka:na:ta: kota: koto somema: mo Ketisota: ala:ta: ma:nda: na talolo hata: pa yako peaa hala: tupa: ipiki make haj peama:na: pa yako peatiki pu hala:me.

<sup>4</sup>Ma:nda: epita: hoke hau pia:ka:na:ta: Koda:na: pi ula:eki yamba:la:la:me. Pa ekipeke hoke hauta: Koda:na: pi ula:eki yamba:la:la: ekie. <sup>5</sup>Ketiso opolo epeeke ekita: nika: hoke hau mea bawaluekema: a:pa:la:me. Kutupa ipiki pa:ta:ta: hokeeki ma:nda: na ula:me laa hone wilimime. <sup>6</sup>Koto ekina: ma:nda: epi Ketiso yaapo hone homeke wia ta:ma:ni pu haya:ka:na:ta: kota: koto someta: hoke hau pa na pu hala:me.

Pate ma:nda: epita: hoke hau pa putia pea:ka:na:ta: kota: koto someta: Ketiso ota: na handa:la: make hone na ula:me.

<sup>7</sup>Yaka wekiwandikio. Ma:nda:ma: iki na makeaena: lapa:peke. Ma:nda: epima: ota: hau pia:ka:na:ta: kota: koto someta: mo Ketiso pa:la: tupa: tikitiki piki some hala:me. <sup>8</sup>Pate ma:nda: epima: hoke hau pa putia pea:ka:na:ta: koto someta: mo Hoke Temokona:eki hala:me. Pa ekipeke mo Hoke Temokoma:ta: kini pitolo kone hoke hau pa:leke loa:me. Mo Koda:na: Eiyeye opolo a:pa:la: ekita: ota: doeki tekema: pa:la:me. Mo Hoke Temokoma: pa:la:eki hoeyaaluekema: pa:la:me.

<sup>9</sup>Ma:nda: epita: Koda:na: eiyeye haya:ka:na:ta: kota: hoke hau pa na putia pu hala:me. Pa ekipeke Koda:na: da:ta:la:eki kone ipiki pa:ta: pila:me. Kutupa Koda:ta: ipika: Apa: yaalo ipikana:ma: hoke hau pa putia pua:peke na ya:la:me. <sup>10</sup>Mo Koda:na: wekiwandiki pita: mo Hoke Temokona: wekiwandiki yaapo ata:ka: tieke pa:la: ekita: dupae. Ma:nda: epima: mo ota: hau na pu o ipika: yankeke pukima: na homo pia:ka:na:ta: ipikita: Koda:na: weki na hala:me.

### **Pukima: homa: alualu pita:la:eki**

<sup>11</sup>Ikana:ma: mo hande kini pitolo hata: titina: opimi pita: doe. Nikana:ma:ta: ma:nda: ma:nda: pa:ta: pukima: homa: alualu pu hapa:peke ya:la:me. <sup>12</sup>Nikita: mo hande Keinima: na hando hapa:peke ya:la:me. Ipikita: mo Hoke Temokona:eki hata: ipika: hameke Eipolo kone lu homaeyekeme. Pa ekipeke lu homaeyekepe. Do ekina:yeke loa:me. Mo ipika: pieke hau manuta: tikitiki na pitolo haena: ipika: hamekena: hau manuta: tikitiki pikieki yaalo piekeme.

<sup>13</sup>Koto ekina: yaka kame tonuo. Do kenke wanda:halima: iki honditi pia:ka:na:ta: na penkilipa:tia pomia:pa:peke. <sup>14</sup>Mo homa:la:eki mina:pa:lao da:ta:la:eki pa:ta: epoloma: ekita: nika: hone uluma:me. Koto mo nikana:ma: nika: kametonu pa:ta: pukima: homo haloma: ekita: hone ulume laa loa:me. Ma:nda: epima: pukima: na homea:ka:na:ta: ipikita: mo homa:la: ekina: honkopu oto pa:ta: paa hala:me. <sup>15</sup>Ma:nda: epima: ipika: hameke honditi pia:ka:na:ta: kota: koto someta: hali lu homaasa: somee. Kutupa ika: hone wilimima: mo hali lu homaasa: someta: da:ta:la:eki ipiki pa:ta: na ula:me.

<sup>16</sup>Nikana:ma: mo pukima: homa:la: ekita: dupa ya:ka:ta:me laa hone witoloma: ekina: teketa: Ketisoma:ta: nika: anketeke mea ipika: da:ta:la: ekita: halea:me. Koto ekina:ta: nikana:ma: make nika: da:ta:la: ekima:ta: nika: kametonu tamba: muluekema: pa hala:peke ya:la:me. <sup>17</sup>Mo hamoko halima: ipika: hameke ala:ta: ma:nda: dia: ya:la:eki handolo hata: kone hameke pa:ta: ipika: puki na halea:ka:na:ta: pa ekieki pea ipikana:ma: Koda: pa:ta: pukima: homolome laa leliepe. <sup>18</sup>Yaka wekiwandikio. Nika: pukima: homoloma: ekita: kakema: homeke o pima: homeke lapeke na

ya:la:me. Dia:me. Koto pukima: homa:la: ekima:ta: pa mo ota:eki peneme yaena: nika: kikima: pitolo hata: homekee. <sup>19</sup>Kota: kutu pita:la: ekima:ta: mo ota:eki pa:ta: tunaaloma:me laa hone ulumeke. Kutupa dupita:la: ekima:ta: nikana:ma: Koda:na: leke popelekena: puki hana: nokopoloma: ekie. <sup>20</sup>Pate nika: hone tekema: alo hata: nikita: hoke hau poloma:me lea:ka:na:ta: kota: nika: hone uluma: ekita: dupa. Koda:ta: nika: hone paeyaona: aneke hali yaalo ipikana:ma: ala:ta: ala:ta: paeyao hone ula:me.

<sup>21</sup>Koto ekina: yaka pukipiki ta:ma:ni sunuo. Nika: honema: a:nda: niki hoke hau na poloma:me lea:ka:na:ta: kota: nikita: Koda:na: leke popelekena: puki hana: nokopoloma:me. <sup>22</sup>Nikana:ma:ta: ipika: pi ula: ekimanu opua pitolo make ipiki ta:na: homa: tiaasa: haumanu pua halomeketa: kota: nikana:ma: ipiki pa:ta: honke la:la: alemanu mu haloma:me. <sup>23</sup>Kutupa ipikana:ma: mo niki pa:ta: pipee ala: ekita: dupa. Nikana:ma: ipika: Eiyeye Yesu Ketiso pa:ta: hone tulao hata: make pa mo hande Yesuma: leeke tupa: kone niki ameḷe pukima: homa: alualu pu hapa:peke. <sup>24</sup>Ma:nda: epima: Koda:na: pi ula: ekimanu opua pia:ka:na:ta: ipikita: Koda: yaapo tunao hala: make Koda:ta: ipiki yaapo tunao hala:me. Kutupa mo Koda:ma: niki pa:ta: Sipitidi ka:leketa: kota: Koda:ta: niki ameḷe tunao hala:me hone uluma:me.

#### Mo ota: Sipitidi pita: yayapiki sipitidimanu

**4** <sup>1</sup>Yaka pukipiki ta:ma:ni sunuo. Mo Koda:na: Sipitidi moloma:me aleme wanda:hali paeyao pa:ta: hone na tulaake pa ika: ekita: Koda: pa:ta: yama: a:pa:la:pe laa amba:la handaa handa:pa:peke. Pa ekipeke mo makeaaso potopede hali paeyaota: mo kenke honiki paeyao pa:ta: pelemeke loa:me. <sup>2</sup>Dota: ota: Koda:na: Sipitidi ya:ka:ta:me laa handa: ulu peleme tupa:ta: dupae. Ma:nda: epima: a:nda: Yesu Ketisota: do kenke pa:ta: ota: hali a:pa hayekeme laa lea:ka:na:ta: kota: ipikita: mo Koda: pa:ta: yama: ipula: Sipitidi pila:mee. <sup>3</sup>Pate ma:nda: epima: Yesuta: kotoeki na pa:la:me lea:ka:na:ta: kota: koto someta: mo Koda: pa:ta: yama: ipula: Sipitidi na pila:me. Koto some pa:ta: pila: sipitidita: mo Ketisona: a:nda: tunkiliki some pa:ta: yama: a:pa:la:me. Koto ekita: ipiliekee laata: ika: amba: koto opimitaa. Kutupa ameta: do kenkena: amba: koto a:pa:la:taa.

<sup>4</sup>Pate yaka wekiwandikio. Ikita: Koda:na: ekie. Kutupa mo makeaaso potopede manuta: amba: bepolalememe. Pa ekipeke mo iki pa:ta: pila: Sipitidita: do kenkena: wanda:hali tukiki pa:ta: pila: sipitidi tupa: dia:me. Iki pa:ta: pila: Sipitidita: wele wopu pikieki pileke loa:me. <sup>5</sup>Hande makeaasa: potopede manuma:ta: do kenkena: hau manuna: pi hotu halememe. Koto ekina: mo kenke hauna: tapakema:ta: do kenke hauna: tapake haleme ekiyalo koto pi opu halememe. <sup>6</sup>Koto pa:la:pate nikita: Koda:na:eki haloma:me. Kutupa Koda: pa:ta: hone ula: tapakema:ta: nika: pi opu halememe. Pate Koda: pa:ta: hone na ula: tapakema:ta: nika: pi na

opilimikie. Kota: koto hau manuma:ta: mo ota: ekina: Sipitidi ya:ka:ta:me laa make mo yayapiki ekina: sipitidi ya:ka:ta:me laa make nikana:ma: ana:na: tekili pea handa: u hapa:peke ya:la:me.

**Koda:ta: pukima: homa:la:eki**

<sup>7</sup>Yaka ta:ma:ni tonuo. Nikana:ma:ta: ma:nda: ma:nda: pa:ta: pukima: homa: alualu pu hamana:e. Pa ekipeke mo pukima: homa:la: hauna: teketa: Koda:e. Ma:nda: epima: pukima: homea:ka:na:ta: ipikita: Koda:na: eiyeke hala: make Koda: handa:la:me. <sup>8</sup>Ma:nda: epima: pukima: na homo haya:ka:na:ta: ipikita: Koda: na handa:la:me. Pa ekipeke Koda:ta: pukima: homa:la:ekie. <sup>9</sup>Kutupa Koda:ma: ipika: Weki homeke do kenkena: tapaala: ekima:ta: ipika: pukima: homa:la:eki peneme yaala:me. Nikana:ma: mo weki pa:ta: yama: da:ta:la:eki miomono yeke pa:la:mee. <sup>10</sup>Pukima: homa:la: ekita: dupae. Nikana:ma: Koda: pa:ta: pukima: homomeke handa dia:ya:la:pate pa ipikana:ma: niki pa:ta: pukima: homolo hata: ipika: weki tapaala: ekima:ta: nika: hoke hau paeyao paeyawala:me.

<sup>11</sup>Yaka ta:ma:ni tonuo. Koda:ma: nikita: koto tupa: pukima: homo haya:ka:na:ta: kota: nikana:ma: make ma:nda: ma:nda: pa:ta: pukima: homa: alualu pu hapa:peke aleo. <sup>12</sup>Homekesiki ma:nda:ma: Koda: na handa:la:pate pa nikana:ma: a:nda: ma:nda: ma:nda: pa:ta: pukima: homa: alualu pu homoma:ka:na:ta: kota: Koda:ta: niki ameḷe ta:ma:ni pea hata: ipika: pukima: homa:la: ekita: niki pa:ta: tikitiki yao pitaala:me.

<sup>13</sup>Nikita: Koda: ameḷe ta:ma:ni pea haloma: make ipikita: niki ameḷe ta:ma:ni pea hala: ekita: nikana:ma: hone uluma:me. Pa ekipeke ipikana:ma:ta: niki pa:ta: ipika: Sipitidi ka:la:mee. <sup>14</sup>Kutupa nikana:ma: handoloma: ekita: pa mo Atekema: ipika: Eiyeketa: do kenke wanda:halina: pa:ta:la:la: some tapaala:me laa ma:nda: ma:nda: pa:ta: la hala:tiki pu haloma:me. <sup>15</sup>Ma:nda: epima: Yesuta: Koda:na: Eiyeketa: lea:ka:na:ta: kota: koto someta: Koda: yaapo ta:ma:ni pea hala: make Koda:ta: ipiki yaapo ta:ma:ni pea hala:me. <sup>16</sup>Kutupa mo Koda:ma: niki pa:ta: pukima: homa:la: ekita: nikana:ma: hone witolo hata: hone tulaaloma:me.

Koda:ta: pukima: homa:la:ekie. Koto ekina: ma:nda: epita: pukima: homa:la:eki pa:ta: haya:ka:na:ta: kota: ipikita: Koda: yaapo ta:ma:ni pea hala:me. Kutupa Koda:ta: ipiki yaapo ta:ma:ni pea hala:me. <sup>17</sup>Nikana:ma: mo Pi Yokaalu Pilie Natena:ta: pa honkopu hao halo poluekema: yeketa: mo pukima: homa:la: ekita: niki pa:ta: ankulao pitaala:me. Kutupa nikana:ma: miniki halumekee. Pa ekipeke nika: do kenkena: hao peoloma: ekita: mo Ketisona: ekima: kone handa:leke loa:me. <sup>18</sup>Pukima: homa:la:eki pa:ta:ta: paala: pa:la:eki na ula:me. Ota: tikitiki piki pukima: homa:la: ekima:ta: mo paala: pa:la:eki pendulu baasa:me. Koto ekina: ma:nda: epi paala:ma: homea:ka:na:ta: mo pukima: homa:la: ekita: ipiki pa:ta:

tikitiki yao na pitaala:me. Pa ekipeke paala: pa:la: ekita: mo hoke yenki pa:ta: apa:taleke loa:me. <sup>19</sup>Koda:ma:ta: niki amba:la pukima: homeeke handaa nikana:ma: make pukima: homo haloma:me. <sup>20</sup>Kota: ma:nda: epima: Koda: pa:ta: pukima: homolome alo hata: kone ipika: kame honditi pia:ka:na:ta: kota: ipikita: yayapiki pi ala: somee. Pa ekipeke mo ipika: lekema: handa:la: kameta: pukima: na homolo haya:ka:na:ta: kota: mo ipika: lekema: na handa:la: Koda: pa:ta: make pukima: homa:peke na ya:la:me. <sup>21</sup>Mo hande Ketisoma: niki pa:ta: ka:la: pi ula: ekita: dupae. Ma:nda: epima: Koda: pa:ta: pukima: homea:ka:na:ta: kota: ipikita: mo ipika: kame pa:ta: make pukima: homa:peke ya:la:me la:la:me.

### Kenke hau bepolaloma:eki

**5** <sup>1</sup>Ma:nda: epima: Yesuta: Ketisoe laa hone tulaeya:ka:na:ta: ipikita: Koda:na: eiyeke hala:me. Kutupa ma:nda: epima: ateke pa:ta: pukima: homea:ka:na:ta: kota: ipika: eiyeke make pukima: homa:la:me. <sup>2</sup>Nikana:ma: Koda: pa:ta: pukima: homolo make ipika: pi ula: ekimanu opua pu haloma: ekita: kota: kotota: ipika: wekiwandiki make pukima: homoloma:me laa pa handoloma:me. <sup>3</sup>Nika: Koda: pa:ta: pukima: homoloma: ekima:ta: kota: ipika: pi ula:eki opua pitoloma:eki konee. Kutupa ipika: mana: pi manuma:ta: niki ka:nda: na peaasa:me. <sup>4</sup>Paa ekipeke Koda:na: wekiwandiki paeyaoma:ta: do kenke hauta: ota: ana:na: bepolapeke ya:la:me. Kutupa nika: hone tulaaloma: ekima:ta: do kenkena: hau bepolatia pu haloma:me. <sup>5</sup>Kota: epima: do kenkena: hau bepolapeke ya:la:pe. Mo Yesuta: Koda:na: Eiyekee laa hone tulaasa: somema: homeeke.

### Yesu Ketisona: wekitisimanu

<sup>6</sup>Yesu Ketisota: mo ikalima: bapitaisi pita:la: hauna: make ipika: we holo pieke hauna: make epeekeme. Ipikita: mo ikalina: hau homekena: na epeekepa pa mo ikali pita: we yaapo telipuna:na: epeekeme. Kutupa mo Sipitidima: kone peneme yaasota: do hauta: ota:ekie laa ala:me. Pa ekipeke mo Sipitidita: ota: ekie. <sup>7</sup>Do ekina: wekitisi haasa:eki manuta: tepoe. <sup>8</sup>Mo Sipitidi make mo ikali make mo we make koto hau tepoma:ta: homeke peneme yaasa: pi kone alememe. <sup>9</sup>Nikana:ma:ta: do kenke halina: peneme yao ala: pi hone tulao haloma:pate pa Koda:na: peneme yaasa: pita: ota: honkopu wotu hala:me. Kutupa ipika: peneme yaasa: pita: ipika: Eiyekena: alo hata: la:la:me. <sup>10</sup>Koto ekina: ma:nda: epima: mo Koda:na: Eiyeke pa:ta: hone tulaeya:ka:na:ta: kota: koto mo Eiyekena: alo hata: peneme yaasa: pita: ipika: puki pa:ta: ula:me. Pate ma:nda: epima: a:nda: Koda:ma: leeke ekimanu pa:ta: hone na tulaeya:ka:na:ta: kota: ipikana:ma: Koda:ta: yayapiki pi ala: somee ala:me. Pa ekipeke koto somema:ta: mo Koda:ma: ipika: Eiyekena: alo hata: la:la:eki hone na tulaala:me



loa:me. <sup>11</sup>Mo peneme yao ala: pita: doe. Koda:ma:ta: niki pa:ta: da:taa hao hala:eki ka:la:me. Kutupa do da:ta:la: ekina: teketa: ipika: Eiyeeke. <sup>12</sup>Ma:nda: epima: mo Eiyeeke ma:na:la: someta: kota: mo da:ta:la:eki u hala:pate pa mo Koda:na: Eiyeeke na ma:na:la: some ipikita: da:ta:la:eki na wia hala:me.

### Da:taa hao hala:eki

<sup>13</sup>Ima: iki pa:ta: do laaso ekita: mo da:ta:la:eki ikana:ma: amba: melememe laa hone uemena:yeke pitolome. Koto mo Koda:na: Eiyeeke pa:ta: hone tulaaseme wanda:hali iki pa:ta: loa:me <sup>14</sup>Nikita: Koda:na: leke popelekena: honkopu mo:loma:me. Pa ekipeke mo nikana:ma: ipika: hone pa:la: ekina: ala:ta: ma:nda: honke loma:ka:na:ta: ota: opita:la:me laa nika: hone uluma:me. <sup>15</sup>Nikana:ma: ipiki pa:ta: honke la:tiki pu haloma:eki manuta: ota: opu hala:me hone ula:me. Kutupa koto ekita: ota: ekie laa hone uma:ka:na:ta: kota: ipiki pa:ta: alemanu honke la:tiki pitolo hata: ku hala:me hone uluma:me.

<sup>16</sup>Iki ame:le homekema: ipika: hamekema: mo homena: na la:la: hoke hau ma:nda: pita:la:eki handea:ka:na:ta: kota: mo somena:eki Koda: pa:ta: yeni peaapeke ya:la:me. Kutupa Koda:ma: ipiki da:taena: lelieke. Koto hauta: pa mo homena: lapeke na ya:la: hoke hau pu haleme wanda:hali pa:ta: loa:me. Pate mo homa:la:eki pa:ta: hatuku polo pa:la: hoke hauta: ta:ta: ma:nda:e. Koto hauna: Ima:ta: Koda: pa:ta: yeni pea:peke laa na loa:me. <sup>17</sup>Tikitiki na piki hau pita:la:eki paeyaota: hoke haue. Pate mo homa:la:eki pa:ta: na hatuku pula: hoke hau make ula:me.

<sup>18</sup>Nikana:ma: mo Koda:na: weki wandikima:ta: hoke hau pa na pitolo ombu hala:me laa hone uluma:me. Pa ekipeke mo Koda:na: Eiyekema: iki handeteke hala:me ekita: mo Hoke Temokoma: iki hoeyaapeke na ya:la:me. <sup>19</sup>Do kenketa: mo Hoke Temokoma: kilu tombuao hala:pate pa nikita: Koda:na:eki haloma:me laa hone uluma:me.

<sup>20</sup>Nika: hone uluma: ekita: mo Koda:na: Eiyeketa: niki hone lenkipa wita:la:eki kulu a:pa:la:me. Pa ekipeke nikana:ma: mo ota: Koda: hone ulu poloma: tupa: pa:la:me. Ipiki ame:le hone homeke witolo hata: pa ipika: Eiyeeke Yesu Ketiso kone hone homeke wia haloma:me. Ipikita: mo ota: Koda:e. Kutupa ipikita: deto hala: ekina: tekee. <sup>21</sup>Yaka wekiwandikio. Mo yayapiki koda:manu teke pa:ta: na hapa:peke.